

Die Songtexte 2019

Und hier sind sie, die Songtexte der Stedtlischiiisser 2019:

Stedtlischiiisser 2019 mit dem Programm House of Chnorz



1 BREXIT! Schluss und duss!


Fuck you European Union! Brüssel, blooset üs i d Schueh!
Frässet Sand, dir Gurkechrümmer! Mir hei gnue! Löht üs in Rueh!
Das Europa wo die plane, isch und blibt es riese Gknorz.
Brexit, Schluss und mir si dusse! - Das seit Euch hüt s House of Lords.

D Grieche schaffe gäng no nüt, z Italie stürze d Brügge ii
Spanie spinnt, und z Ungarn üebt me russischi Demokratie
Z Pole chlaut me nur dis Auto. Z Rumänie alls, wo häre charsch.
Und dank Gilets jaunes isch Macrons “France en marche” jetz d “France am Arsch”!

Hurra uf Euch Eidgenosse! Euch chocht d EU au nid weich.
Let us make e Allianz, will Dir sit jo im gliiche Seich:
Brüssel wott es “Rahmenabkommen”? Mir säge Euch what this does mean:
Wenn bällsch chunsch a die churzi Leine! - So wie d Hündli vo dr Queen!

Mir und dir si beides Insle, Lüüchttürm i dr Finschternis.
Zäme si mir doch die Gröschte, d EU die het jetz scho Schiss.
Oberhuus und Gmeindsversammlig passe zäme: S wird nur gschnurt.
:Und au d Garnitur isch ähnlech: Mir hei d Queen und dir dr Kurt:

Melodie: Ludwig van Beethoven; Ode an die Freude



2 Simsalabim und verschwunde

Füfzäh Diplomate, bereit zu üble Tate
Göh is Konsulat und packe d Sagi us.
Si warte uf ne Joggi, dr Journalischt Kashoggi,
Si hei für ihn kei Schoggi, si gäh kei Interviews.
Ihre Prinz het gseit: „Mit däm redt me jetz Fraktur!
Dä vertrift mit sim Gschribsel mini Chunde.“
Me redt – – und gli druf wird s Abwasser suur.
Simsalabim, dä isch verschwunde!



Grad wie ne Fata Morgana: So nöch und doch nümm do.
Grad wie ne Fata Morgana!
AbraKadavero! – Und är isch nümme do!

Grad wie ne Fata Morgana: So nöch und doch nümm do.
Grad wie ne Fata Morgana!
AberWoKadaverWo?? – Dä isch nümm füré cho!

Schnäll isch jede Saudi e Terrorischte-Raudi.
D Press het ihres Gaudi a dr Liich wo fählt.
Aber die Empörig über die Verschwörig
Isch halt gliich e Störig, will die goht is Gäld!
Wenn dr Prinz dört drum mit de Milliarde winkt
Ghört me halt lieber zu de Chunde!
Jedi Regierig weiss, dass Gäld nid stinkt.
Und schwupp! - Die Empörig isch verschwunde!

Grad wie ne Fata Morgana: So klar und doch nümm do.
Grad wie ne Fata Morgana!
AbraKadavero! – D Saudis si doch gar nid so!

Grad wie ne Fata Morgana: So klar und doch nümm do.
Grad wie ne Fata Morgana!
AbraKadavero?? – Jetz tüet doch nid eso!


Melodie: Erste Allgemeine Verunsicherung; Fata Morgana

3 Mir wie nume spielle

Es grauet dr Morge, es foht afo tage. Sirene und Blauliecht gö los.
e Sondertransport im ne bächschwarze Wage, brämset vor üs uf dr Strooss.
Druus gumpe ganz grimmig, halb Mönsch und halb Tier
Es Batallion vo Gebirgsgrenadier
Stacheldroht, Fluetliecht, e Bluethund wo bällt,
ruck zuck und das Gländ isch hermetisch umstellt.

Mit Axt und Motorsagi göh si druf loos, es Holzgrüscht het kapituliert,
Si hacke, si freese und luege nid gross, e Stäge wird ganz wägrasiert.
Si tüe jedi Kante mit Watte drapiere
Ums ganze muess tändig ei Maa patrulliere.
Jo, d Stadt het die nötigschte Massnahme troffe.
Dr Spielplatz im Chantier isch jetz wieder offe.

Melodie: Reinhard Mey; Diplomatenjagd



4 Klimastreik

I bi d Klima – Greta und i go go demonschtriere!
Demo das isch cool und i d Schuel go das isch doof

S Klima isch vil z warm und das tuet mi deprimiere.
I ha furchtbar Angscht! Wär das nid het isch es Schof!

Hey Klima – Greta! Tue zittere, twittere, Rede ha
Hey Klima – Greta! Bring üs um üse Schlaf!

Hey Klima – Greta! Du postisch uf allne Media.
Hey Klima – Greta! Du bisch e tolle Goof!

Es isch famos! Jetz schnurt si au z Davos.
Dr Handligsdruck isch gross. - Dr Putin wird die Warme los!

Es isch famos! Jetz gö all Chind uf d Stross
Si wei jetz Tate gseh. Doch nei, em Trump het s eh zvil Schnee!


Und wenn si müed si, göh si wider hei.
Will si i d Ferie wei: Per Easy-Jet i d Südtürkei!

Melodie: Astrid Lindgren; Hej, Pippi Langstrumpf



5 D Muur

Es isch mol e Maa gsi, dä het e Vision.
Är het gseit: „I bliibe ke Buur!
I mache Karriere
I schaffe d Misere
I baue Euch e Muur! – I baue Euch e Muur!“



Si Vatter winkt ab. Si Mueter die grännet:
„Jetz bis doch nid so stor! -
Du wottsch doch nüt Schlächts.
Chumm mach öppis Rächts!
Hör uf, süsch wird i suur! Vergiss die cheibe Muur!“

Doch är goht si Wäg. Graad uf sire Spur.
Si Familie treit lang scho Truur.
Sini Lüt chöi verarme.
Nüt tuet ihn erbarme.
Nüt goht für ihn über ne Muur! S git nüt für ihn usser die Muur!

So isch är no hüt, sine Lüt e Tortur.
Es hilft ihm kei Närve-Kur.
Är isch voll im Saft
Und wär weiss öb är s schafft:
Är baut Chlotz für Chlotz a sir Muur. Är baut Chlotz für Chlotz a sir Muur.

Gottseidank isch dä Maa – üse Kevin – no chlii.
Är baut nur e LEGO – Muur.
Me wünschti sich doch, s sött bi allne so si!
S wär besser für d Konjunktur! S wär besser für d Konjunktur!

Melodie: Johnny Cash; The Wall

6 «90-60-90», hei si gseit

Zieh si wenigschtens dr Vorhang! – Per favore! – Nja! Ey! Per favore! Oh!
Zieh si wenigschtens dr Vorhang! – Per favore!
Süschen gseht me jo alli 10 Millone Posizione!

«90 – 60 – 90» hei si gseit!
«Und är achtehalb Zoll!» hei si gseit. «Mol mol! » hei si gseit, ey!
«Und jetz lueg emol wie är ihri ... tü! tü! tü!» hei si gseit «tü! tü!»

I muess jetz jede Tag is Solheure go. – Und nimm en Apéro.
De lueg i übere zum Hotel do. – Gli müesse si cho.
Jo nume sie, und no en angre. Und de si si permanänt dranne.
Si zeige jedi Nummere, Nummere! Nume zum Mitmache isch s vil z wit!

Zieh si wenigschtens dr Vorhang! – Per favore!
Jo, die chöi alli 10 Millone Posizione!
Und wenn si nächär pro Minute 3 vo dene Nummere usprobiere
De cha s maximal nume sächsehalb Johr lang go, bis zum Znacht.

«90 – 60 – 90» hei si gseit!
«Und är achtehalb Zoll!» hei si gseit. «Mol mol! » hei si gseit, ey!
«Und jetz lueg emol wie är ihri ... tü! tü! tü!» hei si gseit «tü! tü!»

Und so hei si s sit Johre no nie zum Znacht gschafft
Und das isch guet! Will wenn de weisch
Wie me i däm Hotel chochet: Denn denkt jede:
Machet doch weiter, dir verpasset net


Melodie: Lo & Leduc; 079



8 Lädelisterben

Dr Geier flügt dur s Bieltor ii
Es Lädeli biisst is Gras!
Es isch no lang nid s letschte gsi
Es Lädeli biisst is Gras!
Will hüt chaufsch alls im Internet.
Will das so praktisch isch.
Vo r Handcreme bis zum Schatz im Bett
Und em Fueter uf dim Tisch.

--- *Bohnebluescht !!* Es Lädeli biisst is Gras!
--- *Häfeli !!* Es Lädeli biisst is Gras!



Und s isch wider eis wägg und es anders furt
Es Lädeli biisst is Gras!
S nützt nüt, rüefsch au em Fluri Kurt
Es Lädeli biisst is Gras!

--- *Oviesse !!* Es Lädeli biisst is Gras!
--- *Schild !!* Es Lädeli biisst is Gras!
--- *Drogerie Gerber !!* Es Lädeli biisst is Gras!
--- *Ex Libris !* Es Lädeli biisst is Gras!


Doch s Volk rüeft us: „Das isch gemein!!“
Jetz wehrt sech au dr Gwärbverein
Ersch jetz isch Schluss, s goht nüt me zue
Jo, jetz isch ändlech Rueh! --

Jetz git s nur no Schueh.

Melodie: Queen; Another One Bites The Dust

9 Dört und do chli übercho

Dört chli übercho, do chli übercho,
Gäng öppe mol es Gschänkli.
Tickets übercho, Reisli übercho,
Und hie und do paar Fränkli.
Spese übercho, Ferie übercho.
Nei, das si doch kei Sünde!
I ha jo niemerem nüt gno! I ha alles übercho!
--- Und zwar vo Fründe!



I bi kei Nobody !!

Me git mir! *Me nimmt dir!* Me git mir! *Me nimmt dir!*
Me git mir! *Me nimmt dir!* Me git mir! *Me nimmt dir!*

Wär mi gseht, dä ladt mi grad ii.
Merci, mon ami ! I bliibe! No chli!
Gib no chli! Gib no chli! I bliibe! I bliibe! I bliibe! Je reste!! ...
I cha gar nid go. Würd jo kei Ränte übercho.
Was cha n i mache do?!! ---

Diräkter irgendwo, Banke-CEO ?
Do müsst i schier no schaffe.
Für Bundesrot isch zspot. Regierigsrot, das goht.
Tscheget s! Dir Gänfer Affe!
Nur ei Karriereschritt, zu däm ha n i nümm wit
Dir heit s sicher scho begriffa
Jo, nur **ei** Job wartet no und dä wird i übercho:
Presidänt vo r FIFA !! - Yeah!

Melodie: Louis Prima; Just A Gigolo

10 Mit der Gondelbahn

Dört, näbem Bau-Container, dört zwüsche Schutt und Gröll
Dört stohts so gross und mächtig. S gseht us wie i dr Höll.
Und gsehsch du dört e Gränchner, isch dä gwüss nid elei:
Die fühlle sich bim Kurhus halt wie bi sich dehei.

Ooooooooooooooh

Mit dr Gondelbahn, bis zum Baggerkran - - - uf üsem Wiisstei
Gsehsch Architektur, do wird di Mage suur - - - uf üsem Wiisstei
Chuum ab dr Gondelbahn, göggisch ganz spontan - - - uf üsem Wiisstei
Wanderer, do findsch kei Rueh! Do frisst di höchstens d Muetterchue!
Au wenn Downhill fahrtsch, de bisch schnäll am A....bstiige, uf üsem Wiisstei

Hollerioho! Dä Jodel isch vo do! (Oder so).

Me baut dört so nes Triibhus, das isch innovativ!
Me molt a d Triibhusfächter so Vogelschutzmotiv.
Die Arme Vögle dusse, die flüge nid is Glas.
Die Riiche dinn im Triibhus. E jede het si Spass!

Ooooooooooooooh

Mit dr Gondelbahn, bis zum Grössewahn - - - dasch üse Wiisstei
Macht dr Frass di muff, s het gäng Flöige druff - - - dasch üse Wiisstei
Suecht e Darm chli Rueh, de goht grad s Kurhus zue! - - - dasch üse Wiisstei
Dasch üse Plan, das muess so si! Jürgen Hofer, schick di dri!
Will eso vil Shit, goht für d Chinese nit. -- Die bliibe grad dehei! Yuhuu!

Melodie: Michelle Ryser; Mit der Gondelbahn



11 Gränche, positiv

Dä Gränchner Film im Färnseh isch jo würklech nid e fiine:
Gränche sig e wüeschi Stadt, e Industrieruine.
D Gränchner gienge chuum go stimme, sige pessimistisch,
S heig e huufe Frömdi dört, dr Räschte sig rassistisch.

Gränche schloht jetz zrugg, e Gägefilm zeigt sunneklar
alli schöne Site, es kompletts Inventar,
Alls was guet und positiv isch z Gränche, het er gfunde.
Mit Titel und mit Abspann geit dä Film gnau drei Sekunde.

Melodie: Britisches Kinderlied; Itsy Bitsy Spider

